

समा. 09.20 Hrs

Headlines

1. वित्त मंत्री निर्मला सीतारमण होंरें आखेआ ऐ जे माल-समेयान ते सेवाएं सरबन्धी नमीं जी.एस.टी बवस्था, बसनीकें आसेआ कीती जाने आहली खपत च सुधार करोग ते कुसै बी चाल्ली कन्नै पूंजीगत खर्चें पर असर नेई पाग।
2. अंतर-मंत्रालयी केन्द्री टीम नै हाड़ें दी मारें हेठ आए दे उधमपुर ते रियासी जिलें दा दौरा लाइयै उत्थे होए दे नुकसान दा जायजा लैता।
3. स्कूली शिक्षा निदेशालय जम्मू नै स्कूलें गी परतियै खोलने ते ऑफलाईन पढ़ाई दी बवस्था फही बहाल करने सरबन्धी दिशा-निर्देश जारी कीते न।
4. जम्मू-कश्मीर स्कूली शिक्षा बोर्ड नै 10मीं ते 11मीं जमात दे म्तेहानें लेई नमें सिरेया डेट-शीटां जारी कीतीआं न।
5. जम्मू-श्रीनगर राष्ट्री जरनैली सिड़क, अज्ज बी गड़डिणं दी आओजाई लेई बंद ऐ। कुसै बी गड़डी गी अज्ज जखैनी उधमपुर थमां श्रीनगर जाने ते उत्थुआं इत बक्खी औने दी इजाजत नेई होग।

< > < > < > < > < > < >

Fin Min

केन्द्री खजाना मंत्री निर्मला सीतारमण होंरें आखेआ ऐ जे माल-समेयान ते सेवाएं सरबन्धी नमीं जीएसटी बवस्था, बसनीकें आसेआ कीती जाने आहली खपत च सुधार करोग ते कुसै बी चाल्ती कन्नै पूंजीगत खर्चें पर असर नेई पाग। खबरें आहले इक निजी चैनल गी दिते गेदे इंटरव्यु च सीतारमण होंरें आखेआ जे 99 फीसद माल-समेयान ते सेवाएं पर हून जां ते कोई जीएसटी नेई लाया जा'रदा जां फही ओह 5 जां 18 फीसद जीएसटी दे दायरे हेठ आवा करदि'आं न। मंत्री होंरें इब्बी आखेआ जे पेट्रोलियम उत्पादें सने शराब गी बी जीएसटी दे दायरे चा बाह रक्खेआ जाहग। उ'नें दस्सेआ जे सरकार, अमरीका आसेआ लाए गेदे 50 फीसद टैरिफ करी प्रभावत होए दे निर्यातकें दी मदाद लेई किश हीलें पर कम्म करै करदी ऐ। तोआई आकाशवाणी समाचार कन्नै इक चेचे इंटरव्यु च अप्रतक्ख टैक्सें ते कस्टमस सरबन्धी केन्द्री बोर्ड दे अध्यक्ष संजय कुमार अग्रवाल होंरें अगली पीढ़ी दे जीएसटी सुधारें गी बड़ी दलेरी भरोची ते व्यापक गैह करार दिता ऐ।

<><><><><><>

IMCT-Udhampur Reasi Visit

जम्मू-कश्मीर च हाल च होई दियें भारी बरखें ते हाड़े कन्नै होए दे नुक्सान दा आकलन करने लेई अंतर-मंत्रालीय केन्द्रीय दल नै कल रियासी ते उधमपुर जिले दा दौरा कीता। दल नै उधमपुर दे Malhar ते Thard दे प्रभावित इलाकें दे कन्नो-कन्नी जम्मू-श्रीनगर राष्ट्रीय जरनैली सिड़क दे नुक्सान पुज्जे दे हिस्सें दा बी निरीक्षण कीता। नुक्सान दा आकलन करने लेई दल नै Domel –कटड़ा हाइवे, लास-पस्सियां पौने करी प्रभावित होए दा बलानी पुल ते कटड़ा च शनि

मंदरै सनें होरनें प्रभावित थाहरें दा निरीक्षण कीता। दौरे दौरान अंतरमंत्रालीय दल नै जमीनी सतह पर बनी दी स्थिति बारे जानने लेई मकामी प्रशासन कन्ने बी गल्लबात कीती।

<><><><><><>

Div. Com Udhampur Visit

जम्मू दे डिविजनल कमीशनर रमेश कुमार थर्ड च जम्मू-श्रीनगर राष्ट्रीय जरनैली सिड़कें दे पस्सियां पौने करी प्रभावित हिस्सें दा दौरा लाइयै उत्थे जारी पुर्नबहाली आले कम्में दा जायजा लैता। डिव.कॉम होरें हाइवे दे नुकसान पुज्जे दे हिस्सें दा निरीक्षण करने मगरा मुतलका एजेंसियें गी निर्देश दिते जे इस प्रक्रिया गी तौले शा तौले पूरा करने लेई बाद्दू मशीनरी ते अमले गी लाया जा। दौरे दौरान मुख करी ध्यान कैथगली-मोंगरी, रामनगर-बसंतगढ़ ते चनैनी सुद्धमहादेव सिड़के दी मरम्मत पर दिता गया तांजे इनें सिड़कें गी तौले गै गड़्डियें दी आओ-जाई बहाल कीती जाई सकै। डिव.कॉम होरें मुतलका एजेंसियें गी निर्देश दिते जे सिड़के थमां मलबे गी हटाए जाने आले कम्में गी तौले गै पूरा करन ते महत्वपूर्ण सिड़कें पर गड़्डियें दी आओ-जाई बहाल करने लेई हर चाली दे उपाएं गी अपनान।

<><><><><><>

Air Force (Dispatch)

उधमपुर दा जिला प्रशासन ते वायु सेना, पंचैरी ते मोंगरी इलाकें च खराब मौसम दी मारै हेठ औने करी बेघर होए दे लोकें दी मदाद लेई पूरी सरगर्मी कन्ने लगातार कम्म करै करदे न। मनुक्खी सहायता ते आपदा राहत अभियान दे तैहत भारती वायु सेना दे एम.आई-17

हेलीकाप्टरें, प्रभावत इलाकें च 55 सौ किलोग्राम राशन पुजाने दा कम्म कीता ऐ। पंचैरी दे डीडीसी जसवीर सिंह होरें आखेआ ऐ जे भारी बरखें ते ल्हास-पस्सियां पौने करी बेघर होए दे परोआरें लेई एह् राहत समग्री उपलब्ध करोआई गई ऐ।

<><><><><><>

IIMJ Painting Event

IIMJ जम्मू आसेया अज्ज इक वशेष चित्रकारी समारोह जेहदा विषय सार ऐ- “रंग ते रचनात्मकता” K K Gandhi हुंदे कन्नै Live चित्रकारी ते प्रदर्शनी संस्थान दे परिसर च आयोजित कीता जाग। जेहदे च मन्ने-पमन्ने दे चित्रकार कमलेश के. गांधी होर जम्मू-कश्मीर दी सांस्कृतिक ते कुदरती विरासतें गी दर्शाने लेई इक खास Live Painting सत्र दा प्रदर्शन करगंन। “प्रकृति माहनु” दे नां कन्नै जाने, जाने आले K K गांधी हुंदी रचनाएं च जनजातीय समुदायें दी भावना ते इस खिते दे कुदरती छलैपै गी बड़े गै सनाहकड़े ढंगै कन्नै प्रदर्शित कीता गेदा ऐ।

<><><><><><>

DSEJ-Sec, Reopening

जम्मू संभा दे सब्भनें सरकारी ते निजी स्कूलें गी अज्ज बंद रक्खेया गया ऐ। स्कूली शिक्षा निदेशालय जम्मू आसेया जारी कीते गेदे इक हुकमै च सब्भनें स्कूलें दे प्रधान ते अमले गी निर्देश दिता गया ऐ जे ओह 8 सितम्बर गी ड्यूटी पर रिपोर्ट करन ते स्कूली ईमारतें दी व्यापक सुरक्षा लेई Safety Audit यकीनी करन। स्कूलें दे प्रधानें गी निर्देश दिता गया जे Offline क्लासां परतियै शुरु करने शा पैहले सुरक्षा गी ध्यानै च रक्खदे होई 10 सितम्बर गी इस बारे

उचित फैसला लैन। हुकमै च सब्भनै मुतलका धड़ें गी इस निर्देश दी समेसिर पालमा यकीनी करने लेई आक्खेया गया ऐ।

<><><><><><>

JK BOSE

जम्मू-कश्मीर स्कूली शिक्षा बोर्ड नै इसलै चला रदे 10मीं ते 11मीं जमात दे मतेहानें लेई नमीं तरीखें दी घोषणा कीती ऐ। जम्मू-कश्मीर दे मते सारे इलाकें च मौसम दे खराब होने ते हाड़ें जनेही स्थिति बनने मगरा विद्यार्थियें दी सुरक्षा गी दिक्खदे होई केंई म्तेहानें गी अगड़ा पाई दिता गया हा। हुन मौसम च सुधार गी दिक्खदे होई म्तेहानें लेई नमीं तरीख दी घोषणा करी दिती गेई ऐ। विद्यार्थि इस बारे पूरी जानकारी JKBOSE website www.jkbose.nic.in पर जाइयें हासल करी सकदे न।

<><><><><><>

Highway Status

जखैनी ते बल्ली नाला इलाके बश्कार सिड़क संपर्क कटोई जाने दे चलदे जम्मू-श्रीनगर राश्ट्री जरनैली सिड़क गड़्डिएं दी आओजाई लेई अजें बी बंद ऐ। ट्रैफिक पुलस आसेआ जारी इतलाह मूजब, नगरोटा थमां चनैनी, पत्नीटॉप, डोडा, रामबन, बनिहाल ते श्रीनगर बक्खी कुसै बी गड़्डी दी जाने दी इजाजत नेई होग। उआं कटरा, रियासी ते उधमपुर दे बसनीकें गी गुजारिश कीती गेई ऐ जे ओह अपना फोटू लग्गे दा शिनाखती कार्ड अपने कन्नै रक्खन तांजे उनेंगी आओजाई मतल्लक कुसै परेशानी दा सामना नेई करना पवै। ट्रैफिक पुलसै मूजब, किश्तवाड़-सिंथन-

अनंतनाग सिङ्क बी गङ्गिणं दी आओजाई लेई अजें बंद ऐ जिसलै के मौसम साफ रौहने दी सूरतै च मुगल रोड पर छड़ी हौली मोटर गङ्गिणं दी आओजाई दी खुल्ल दिती जाहग।

<><><><><><>

Ramban Rains

रामबन दे डिप्टी कमिशनर मोहम्मद अल्यास खान होरें आखेआ ऐ जे जिले च भारी बरखें की तकरीबन 900 लोकें गी सुरक्षित थाहें पर पुजाया गेआ ऐ जिसलै के केई सिङ्कें गी बड़ा मता नुकसान पुज्जा ऐ। उ'नें इब्बी दस्सेआ जे सिङ्कें सने प्रभावत होए दे होरने ढांचे दी ब्हाली लेई कम्म जंगी सतह पर तोढ़ चाढ़ेआ जा'रदा ऐ। डिप्टी कमिशनर होरें गलाया जे बरखें करी, केई थाहें पर ल्हास-पस्सियां पौने दिआं घटनां पेश आइयां ते दरेयाएं च पानी दा स्तर, खतरे दे निशान गी पार करी गेदा हा। उ'आं उ'नें इब्बी दस्सेआ जे समूलचे रामबन जिले च बिजली ते पानी दी 90 फीसद सप्लाई ब्हाल करी दिती गेई ऐ।

<><><><><><>

PM Awas

प्रधानमंत्री आवास योजना मुख्य भरै च केई गरीब परोआरें लेई वरदान साबत होआ करदी ऐ। इस योजना दे तैहत लाभार्थिणं गी नमां घर बनोआने, खरीदने जां मजूदा घरै दे विस्तार लेई माली मदाद दिती जंदी ऐ ते एह मदाद सिद्धे लाभार्थी दे बैंक खाते च मुंतकिल हुं'दी ऐ। इस योजना दा लाह आर्थिक तौरा पर कमजोर परोआरें, घट्ट औंदन आहले परोआरें ते दरम्याने दर्जे

दी औंदन आहले परोआरें गी गै दिता जंदा ऐ। इस सरबंथै च आकाशवाणी समाचार कन्नै गल्ल
करदे होई रामबन दे असिस्टेंट कमिशनर मोहम्मद अशफाक होरें आखेआ

<><><><><><>